



PATNUBAY SA MISA



12 Setyembre 2021

Ika-24 na Linggo sa Karaniwang Panahon

Taon B

ARAW NG MGA LOLO'T LOLA

Ang Krus, Bukal ng Ating Pag-asa't Kaligtasan

Ipinaaalaala sa atin ngayon ang tungkulin nating lahat – pasanin ang ating krus sunod sa yapak ni Kristo. Ito’y di isang bagay na malugod nating tinatanggap pagkat ang krus ay laging may kaakibat na pagdurusa at kamatayan. Natural nating pinipili ang buhay at pagpapasarap sa buhay. Gayunman, lagi nang nariyan ang krus sa abot-tanaw ng ating buhay. Maaaring ito ang krus ng pagkakasakit, mga natural na kapansanan, mga kabiguan, o kawalan ng katarungan. Maaari rin itong krus ng pagsasabuhay ng ating pananampalataya, gaya ng paalaala sa atin ni Santiago sa Ikalawang Pagbasa ngayon. Maaari ring ito ang krus ng pagpaparaya sa isa’t isa sa ating pamilya, sa ating pinapasukang trabaho, sa ating mga pamayanan . . .



Sa Eukaristiyang ito, hilingin natin ang biyayang mapasan natin ang ating krus nang buong tiyaga at pananalig, at laging inaalalang ang krus ay siyang dakilang tulay tungo sa langit.

Ipanalangin din natin ang lahat ng Katekista at ating mga lolo’t at lola dahil ito ay Araw ng Linggo, tayo ay inaanyayahan na igalang at ipanalangin sila.

PASIMULA



Pambungad

(Ipahahayag lamang kung walang awiting nakahanda.)

Kapayapa’y ibigay sa bayan mong naghihintay upang iyong patunayang propeta’y maaasahan. Dalangin nami’y pakinggan.

Pagbati

P–Papuri at luwalhati kay Hesus na nagligtas sa atin sa pamamagitan ng dugo ng kanyang krus. Ang kanyang biyaya at kapayapaan ay sumainyong lahat!
B–At sumaiyo rin!

Pagsisisi

P–Sa paghahanda natin para sa pagdiriwang ng misteryo ng

Pagpapakasakit, Kamatayan, at Muling Pagkabuhay ni Kristo, alalahanin natin ang ating mga pagkukulang at pakumbaba nating hilingin ang pagpapatawad ng Panginoon. (Manahimik saglit.)

P–Panginoong Hesus, tinubos mo kami ng iyong buhay. Panginoon, kaawaan mo kami!

B–Panginoon, kaawaan mo kami!

P–Panginoong Hesus, hiningi mo sa iyong mga disipulo na pasanin nila ang kanilang krus at manunton sa iyong mga yapak. Kristo, kaawaan mo kami!

B–Kristo, kaawaan mo kami!

P–Panginoong Hesus, inaasahan mo kaming tulongan namin ang aming kapwa sa pagpasan ang krus ng kanilang mga pag-

subok. Panginoon, kaawaan mo kami!

B–Panginoon, kaawaan mo kami!

P–Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B–Amen!

Papuri

B–Papuri sa Diyos sa kaitaasan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

This issue of *Patnubay sa Misa* may be downloaded for free anywhere in the world. A "love offering" for the continuation of our apostolate will be appreciated. Please, send your donation to "Word & Life Publications." Our Savings Account is BPI – # 3711-0028-46. Send us a copy of the deposit slip with your name and (email) address for proper acknowledgment. Thank You!

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P –Ama naming makapangyarihan, ikaw ang Lumikha at Tagapamahala ng tanang umiiral. Tunghayan mo kami upang ang iyong awa ay aming maranasan at ipagkaloob mong ikaw ay aming wagas na mapaglingkurang sa pamamagitan ni Hesukristo kasama ng Espiritu Santo magpasawalang hanggan.

B –Amen!

PAGPAPAHAYAG NG SALITA NG DIYOS



Unang Pagbasa Isa 50:5-9

Inilalarawan sa atin ni Propeta Isaias ang nakaantig na anyong “Nagdurusing Lingkod” na buong hinahong nagtitiis ng lahat ng pahirap, at umaasa lamang sa kanyang kawalan ng sala at sa tulong ng Panginoon.

L– Pagpapahayag mula sa Aklat ni Propeta Isaias

Binigyan ako ng pang-unawa ng Panginoon, hindi ako naghimagsik ni tumalikod sa kanya. Hindi ako tumutol nang bugbugin nila ako, hindi ako kumibo nang ako’y kanilang insultuhin. Pinabayaan ko silang bunutin ang buhok ko’t balbas, gayundin nang lurhan nila ako sa mukha.

Ang mga pagdustang ginawa nila’y di ko pinapansin, pagkat ang Makapangyarihang Panginoon ang tumutulong sa akin. Handa akong magtiis pagkat aking batid na ang sarili ko’y di mapapahiya.

Ang Diyos ay malapit at siya ang magpapatunay na wala akong sala. May mangangahas bang maghabla sa akin? Magharap kami sa hukuman, at ilahad ang kanyang bintang. Ang

Poon mismo ang magtatanggol sa akin. Sino ang makapagpapatunay na ako ay may sala?

Ang Salita ng Diyos!

B –Salamat sa Diyos!

Salmong Tugunan Awit 114

B –*Kapiling ko habambuhay ang Panginoong Maykapal!*

R. M. Velez



Ka- pi-ling ko habambuhay ang Pa-



ngino-ong Mayka- pal!

* Mahal ko ang Panginoon, pagka’t ako’y dinirinig. Dinirinig niya ako, sa dalangin ko at hibik; ako’y kanyang dinirinig tuwing ako’y tumatawag, kung ako ay tumatawag, sinasagot niya agad. **B.**

* Noong ako’y mahuhulog sa bingit ng kamatayan, nadarama ko ang tindi ng takot ko sa libingan; lipos ako ng pangamba at masidhing katakutan. Sa ganoong kalagayan, Panginoon’y tinawag ko, at ako ay nagsumamo na iligtas niya ako. **B.**

* Mabuti ang Panginoon, siya’y mahabaging Diyos, tunay siyang mahabagin at mapagpahinuhod. Panginoon’y nagtatanod sa wala nang sumaklolo, noong ako ay manganib, iniligtas niya ako. **B.**

* Ako’y kanyang iniligtas sa kuko ng kamatayan, tinubos sa pagkatalo, at luha ko’y pinahiran. Sa harap ng Panginoon doon ako mananahan, doon ako mananahan sa daigdig nitong buhay. **B.**

Ikalawang Pagbasa San 2:14-18

Sa siping ito, sinulat ni Santiago ang kilalang pangungusap: “Patay ang pananampalatayang walang paggawa.” Sa gayo’y binibigyan niya ng diin ang pangangailangang lakipan natin ang ating pananampalataya ng mga gawang makatarungan at mapagmahal.

L– Pagpapahayag mula sa Sulat ni Apostol Santiago

Mga kapatid: Ano ang mapapala ng isang tao kung sabihin man niyang

siya’y may pananampalataya, ngunit hindi naman niya pinatutunayan sa gawa? Maililigtas ba siya ng gayong pananampalataya?

Halimbawa: ang isang kapatid ay walang maisuot at walang makain. Kung sabihin ng isa sa inyo, “Patnubayan ka nawa ng Diyos. Magbihis ka’t magpakabusog,” ngunit hindi naman siya binibigyan ng kanyang kailangan, may mabuti bang maidudulot sa kanya iyon?

Gayundin naman, patay ang pananampalatayang walang kalakip na gawa. Ngunit may nagsabi, “May pananampalataya ka at may gawa ako.” Sagot ko naman, “Ipakita mo sa akin ang iyong pananampalatayang walang kalakip na gawa, at ipakikita ko naman sa iyo sa pamamagitan ng aking mga gawa ang aking pananampalataya.”

Ang Salita ng Diyos!

B –Salamat sa Diyos!

Aleluya

B –Aleluya! Aleluya!

Sa krus ni Kristo dinangal itong ating pamumuhay na para sa kanya lamang. Aleluya! Aleluya!

Mabuting Balita Mc 8:27-35

Sa ngalan ng Labindalawa, si Pedro’y nagpahayag na si Hesus ang Mesiya, ngunit mariin niyang itinangging magdurusa ang Mesiya. Sa kanyang tugon, pinaalalahanan ni Hesus si Pedro at lahat tayo sa ating tungkulin na tanggapin ang plano ng Diyos kahit na kailanganin nito ang ating pagtanggì sa sarili.

P– Ang Mabuting Balita ng Panginoon ayon kay San Marcos

B –Papuri sa iyo, Panginoon!

Noong panahong iyon, si Hesus, kasama ang kanyang mga alagad, ay nagtungo sa mga nayon ng Cesareia, sakop ni Filipino. Samantalang sila’y naglalakbay, tinanong niya ang kanyang mga alagad, “Sino raw ako ayon sa mga tao?” Sumagot sila, “Ang sabi ng ilan ay si Juan Bautista kayo; sabi naman ng iba, si Elias kayo; at may nagsasabi pang isa kayo sa mga propeta.”

“Kayo naman – ano ang sabi ninyo? Sino ako?” tanong niya. “Kayo ang Kristo,” tugon ni Pedro. “Huwag ninyong sasabihin kaninuman kung sino ako,” mahigpit na utos niya sa kanila.

Mula noon, ipinaalam na ni Hesus sa kanyang mga alagad na

ang Anak ng Tao'y dapat magbata ng maraming hirap. Siya'y itatakwil ng matatanda ng bayan, ng mga punong saserdote at ng mga eskriba, at ipapapatay. Ngunit sa ikatlong araw, muli siyang mabubuhay. Maliwanag na sinabi niya ito sa kanila. Kaya't niyaya siya ni Pedro sa isang tabi at sinimulang pagsabihan. Ngunit humarap si Hesus sa kanyang mga alagad at pinagwikaan si Pedro: "Lumayo ka, Satanas! Ang iniisip mo'y hindi sa Diyos kundi sa tao."

Pinalapit ni Hesus ang mga tao, pati ang kanyang mga alagad, at sinabi, "Kung ibig ninumang sumunod sa akin, limutin niya ang ukol sa kanyang sarili, pasanin ang kanyang krus at sumunod sa akin. Ang naghahangad na magligtas ng kanyang buhay ay siyang mawawalan nito; ngunit ang mag-alay ng kanyang buhay alang-alang sa akin at sa Mabuting Balita ay siyang magkakamit niyon."

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P –Ang pagdurusa ay sadyang

bahagi na ng ating buhay. Kailangan natin ang biyaya ng Diyos para makilala natin ang tungkulin nito sa ating kaligtasan. Ngunit lalo nating kailangan ang kanyang tulong sa pagpasan natin sa ating mga krus nang buong tiyaga at pagmamahal. Sa harap ng ating kahinaan, manalangin tayo:

B –Panginoon, tulungan mo kaming pasanin ang aming Krus!

* Nawa laging ipahayag ng buong Simbahan ang pagka-Diyos ni Hesus sa mundong malimit na tumatanaw sa kanyang katauhan lamang. Manalangin tayo! **B.**

* Nawa tuwinang pahalagahan ng ating mga pamilyang Katoliko ang kaloob na buhay at patunayan ang kanilang masuyong kalinga sa lahat ng kanilang kapamilya, lalo na sa mga bata, matatanda, at maysakit. Manalangin tayo! **B.**

* Nawa ang lahat ng lolo't at lola ay pagkalooban ng mabuting kalusugan at ng kagalagakan sa pagmamahal at kalinga ng kanilang mga anak at mga apo. Manalangin tayo! **B.**

* Nawa ang mga katekista at lahat ng naglilingkod sa *Catechetical Ministry* nawa ay makita magantimpalaan ng tagumpay ang kanilang mga pagsisikap sa paghubog ng kabataan alinsunod sa mga turo ni Hesus. Manalangin tayo! **B.**

* Nawa ang mga pinuno ng mga grupong relihiyoso at mga pangunahing pamayanang pansimbahan ay laging maging inspirasyon sa iba pang mga miyembro. Manalangin tayo! **B.**

* Nawa ang mga napilitang lumisan sa kanilang sariling bayan ay agad ding makabalik nang malaya't marangal sa kanilang katutubong lugar. Manalangin tayo! **B.**

* Tahimik nating ipanalangin ang ating mga pansariling kahalilingan. (*Tumigil saglit.*)

Manalangin tayo! **B.**

P –Panginoong Hesus, lingapin ng iyong habag ang lahat ng nagdurusa, lalo na ang mga nagdurusa alang-alang sa pananampalataya. Ipagkaloob mo sa kanila at sa amin ang kasiyahan ng iyong mapagligtas na presensiya. Ikaw

na nabubuhay at naghahari magpakailanman.

B –Amen!



P–Manalangin kayo . . .

B –Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P –Ama naming Lumikha, mawain mong dinggin ang aming mga pithaya at paunlakan mo ang paghahaing aming inihanda upang ang mga handog ng bawat isang nagbigay para sambalin ang banal mong ngalan ay magkamit ng karagdagan mong kasiyahan sa pamamagitan ni Hesukristo kasama ng Espiritu Santo magpawalang hanggan.

B –Amen!

Prepasyo IV

P –Ama naming makapangyarihan, tunay ngang marapat na ikaw ay aming pasalamat sa pamamagitan ni Hesukristo na aming Panginoon.

Siya ay naging kapwa naming maaasahan upang may mangu-nang umako sa pananagutan dahil hangad mong magbago ang kinamihansang pagkakanya-kanya ng sangkatauhan. Bunga ng pagtitiis, siya ay nanaig at ang kamatayan ay kanyang nalupig kaya't siya ang aming Daan para aming masapit ang iyong tapat at maaasahang pag-ibig.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B –Santo, santo, santo Panginoong Diyos ng mga hukbo. Napuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B –Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.

PAKIKINABANG



B– Ama namin . . .
P– Hinihiling namin . . .
B– Sapagkat iyo ang kaharian at ang kapangyarihan at ang kapurihan magpakailanman!
Amen!

**Paanyaya sa Kapayapaan
Paghahati-hati sa Tinapay**

B– Kordero ng Diyos . . .

Paanyaya sa Pakikinaabang

P– Ito ang Panginoong Hesus, ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.
B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang
(Ipahahayag lamang kung walang awiting nakahanda.)

Pag-ibig na iyong bigay ay hindi matutumbasan, laging ikaw ang kanlungan ng iyong bayang hinirang na 'yong sinusubaybayan.

Panalangin Pagkapakinabang

P– Ama naming mapagmahal, ang aming kalooban nawa'y pagharian ng aming tinanggap na pakikinaabang upang huwag ang diwa namin ang umiral kundi ang bunga ng pagdiriwang ang laging mamayani sa amin sa pamamagitan ni Heskristo kasama ng Espiritu Santo magpasawalang hanggan.
B– Amen!

PAGWAWAKAS



P– Sumainyo ang Panginoon!
B– At sumaiyo rin!

P– Magsiyuko kayo at ipanalangin ang pagpapala ng Diyos. (Manahimik saglit.)
– Bigyan nawa kayo ng Panginoon nating Diyos ng lakas para pasanin ang mga krus

ng inyong pang-araw-araw na buhay.

B– Amen!

P– Tibayan nawa Niya ang inyong pananampalataya at puspusin kayo ng kagalakan upang magpunyagi kayo sa paggawa ng mabuti.

B– Amen!

P– Akayin nawa Niya kayo sa Kanya at turuan kayong ma-

nunton sa kawanggawa at kapayapaan.

B– Amen!

P– Pagpalain nawa kayo ng makapangyarihang Diyos: Ama, Anak, at Espiritu Santo.

B– Amen!

P– Humayo kayo sa kapayapaan upang mahalina paglingkuran ang Panginoon!

B– Salamat sa Diyos!

Pagsisikap sa Pagtanggap ng mga Mahiwagang Paraan ng Diyos

Jess P. Balon • Isinalin ni Cecilia G. Valmonte, EdD

Ang pagtutol ni Pedro sa hinaharap na pagtanggap at pagpatay kay Hesus ng mga pinuno mismo ng Israel ay di lamang pagpapahayag ng kanyang tapat na pagmamahal sa Guro. Patunay rin ito ng pagiging magkasalungat ng mga propesiya ng malulungkot na mangyayari at ng karaniwang inaasahan sa Mesiyas.

Ang isang “Mesiyas na ipinako sa krus” ay siya ring pangunahing sagabal para sa maraming tao sa pagtanggap nila kay Hesus bilang kanilang “Tagapagligtas,” gaya ng patunay ni Pablo: “Ang ipinangangaral nami’y si Kristong ipinako sa krus – isang katitisan sa mga Judyo at kahangalan para sa mga Hentil . . .” (1 Cor 1:23).


Kung gayon, anong uri ng Mesiyas si Hesus? Siya ang “Mesiyas ng Diyos,” ang “Banal ng Diyos” (Jn 6:69). Misyong niyang pakinaabangin di lamang ang isang bansa, o lahi o pangkat panlipunan, kundi lahat ng tao. Tungkulin niya, sa katunayan, ay iligtas ang bawat tao mula sa mapanirang epekto ng kasalanan – isang panlahat at pangmatagalang misyon! Isang “imposibleng misyon” ayon sa pamantayang pantao sapagkat ang kasalanan ay nakaugat at namiminsala

sa bawat isa sa atin. Gayunman, ang tila imposible sa tao ay hindi naman imposible sa Diyos . . .

Ginagampanan ni Hesus ang kanyang “misyong imposible” sa paraang nakalilito. Ang pagtatamo ng pangwakas na layunin ng ating kaligtasan o kaluwalhatian sa pamamagitan ng hamak na Pagkakatawang-tao (sangguniin Fil 2:7), sunud-sunod na pagtanggap (sangguniin Jn 1:11), kakila-kilabot na pagdurusa at kahiya-hiyang pagkamatay!

Ngunit bahagi rin ng misteryo ng pagiging mesiyas ni Hesus ay ang kanyang Muling Pagkabuhay. Ang pangwakas na bahagi ng misteryo ay nagbibigay-liwanag sa iba pa, at ito’y nagiging katanggap-tanggap na (bagamat di pa rin ganap na maunawaan!) sa pamamagitan ng tulong ng biyaya ng Diyos.

Gayon ang misteryo ni Hesus, ang “Mesiyas ng Diyos,” ating Tagapagligtas – ang misteryo ng ipinako at muling nabuhay na Kristo; ang misteryo ng “buhay sa pamamagitan ng kamatayan” na ating nararanasan araw-araw sa ating paligid at sa ating buhay.



Get acquainted with the life of the Mother of the Lord through the two pamphlets: “Mary of Nazareth, Mother of Jesus” and “Maria, Kasambahay ng Panginoon”

This booklet in all religious bookstores and online thru shopee.ph



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8894-5241; 8475-8945 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Valmonte, J. Domingo, M. Vibiesca, V. David, R. Molomog, D. Daguio

• Illustrations: A. Sarmiento, B. Cleofe • Marketing: J. Feliciano • Circulation: R. Saldua